

et dabit astra rati, cumque aethera Iuppiter umbra  
 perdiderit solus transibit nubila Lynceus.  
 quin et Cecropiae proles vacat Orithyiae  
 temperet ut tremulos Zetes fraterque ceruchos.  
 470 nec vero Odrysius transtris impenditur Orpheus  
 aut pontum remo subigit, sed carmine tonsas  
 ire docet summo passim ne gurgite pugnent.  
 donat et Iphiclo pelagus iuvenumque labores  
 Aesonides, fessum Phylace quem miserat aevo  
 475 non iam operum in partem, monitus sed tradat ut acres  
 magnorumque viros qui laudibus urat avorum.  
 Arge, tuae tibi cura ratis, te moenia doctum  
 Thespia Palladio dant munere; sors tibi nequa  
 parte trahat tacitum puppis mare fissaque fluctu  
 480 vel pice vel molli conducere vulnera cera.  
 pervigil Arcadio Tiphys pendebat ab astro  
 Hagniades, felix stellis qui segnibus usum  
 et dedit aequoreos caelo duce tendere cursus.  
 Ecce per obliqui rapidum compendia montis  
 485 ductor ovans laetusque dolis agnoscit Acastum  
 horrentem iaculis et parmae luce coruscum.  
 ille ubi se mediae per scuta virosque carinae  
 intulit, ardenti Aesonides retinacula ferro  
 abscidit: haud aliter saltus vastataque pernix  
 490 venator quam lustra fugit dominoque timentem  
 urget equum, teneras compressus pectore tigres  
 quas astu rapuit pavido, dum saeva relictis  
 mater in averso catulis venatur Amano.  
 it pariter propulsa ratis; stant litore matres  
 495 claraque vela oculis percussa que sole sequuntur  
 scuta virum, donec iam celsior arbore pontus  
 immensusque ratem spectantibus abstulit aer.  
 Siderea tunc arce pater pulcherrima Graium